

Efeso Tovetumagana Yadi Leta Paulo Givetokilumina

Kivemala

Efeso ani melala kaikaiwabuna Eisiya anafafali wagaine, ada anakalivayavo moyaidi iawaenge-moedi lukimokimone wagaine. Badi yadi yaubada fwayafwaya vavine anayegana Atemisi, ada yadi manuwa ebaoduodu lakaina gimiyamiya Efeso wagaine.

MeEfeso badi keke meIsileli aku kaduwe meIsileli tufodi wadedeku imiyamiya. Ada taidei leta-nai ananuwanuwa lakaina ani Keliso meIsileli kaduwe badi keke meIsileli gi-iveseyanidi. Kaduwe, Paulo ekalesiya gaitoma toiye wagaidiya giluvefosed, tainei ide Keliso vovona aku Banae debaida, kaduwe ide yana manuwa aku Bana manuwa-nai anaunututu, kaduwe ide vaita vavinena anafaiweya aku Banae moganeda.

Vona vesiule. (1:1-2)

Yaubada yana nuwadoga ada yada veseyana

Keliso nodi ani faidiya. (1:3 - 3:21)

Veseyana wagaine nodi kana miyamiya. (4:1-16)

Dewa yuyuvana kana dibusoyogena aku kanamiya malina wagaine. (4:17 - 5:20)

Nagi anaveimeya. (5:21-33)

Biyabiyama ada ina ke tama adiveimeya. (6:1-4)

Toveimeyayavo ke togugai yogoyogodiyavo adiveimeya. (6:5-9)

Yaubada yana lokoloko gaviya faina, ada veta-lakafoi. (6:10-24)

¹ Iya Paulo. Yaubada yana nuwanuwa wagaine gidouweku ke gaveafositolo Yeisu Keliso faine. Yaku vesiule imi moyaimi Efeso wagaine,[†] imiyavo Yaubada yana yoo tabutabumiyavo kadu bademowa Yeisu Keliso nodi waveseyana ke wamiyaveyalata-vagata Banae wagaine.

² Yaubada Tamada ke yada Kauveya Yeisu Keliso yadi nuwadogeya ina lemelememi ada kaduwe aseasemi ina kikiveniwalovidi.

Yaubada yana nuwadoga ada yada veseyana Keliso nodi ani faidiya.

³ Yaubada kana awadavadavana, Banae yada Kauveya Yeisu Keliso yana Yaubada, kaduwe Tamana. Kana awadavadavana faina giawanuwakabubuyeda, ada wagabameya-deya gaitoma seyana seyana iwakadi giawaegedi aluwaluwada yadi miya iwakana faina, ide Keliso nodi kaveseyana.

⁴ Muliya-yo Yaubada babi matatabuna gibubuna aku ide gimadu venuwadadaneda e ada ide yegayegadeyavo ke vetavetabuda kana miyamiya, kaduwe keke tamo yada koyona Banae matane.[†] Yaubada wa yana nuwakabubu nodi

⁵ gimadu venuwadadana ke ide gina awavenatuneda Yeisu Keliso wagaine. Taidei anafaiweya gidewa wagaideya faina Banae Tauna yana nuwanuwa, ada gikivemwamwalina.

[†] **1:1** Gug 18:19-21, 19:1-40, 20:17-38 [†] **1:4** Efes 5:27, Kol 1:22

⁶ Banae wa yana nuwadoga lakai-vagaina gi-awanuwakabubuyeda Natu aseasena wagaine. E ada kana awadavadavana kanavona, “O Yaubada, wa ya nuwadoga ulemelemema, ani ina keke wa fatana. Taidei lakai-vagaina ime wagaimeya!”

⁷⁻⁸ Aku ide Keliso nodi kaveseyana wagaine, adaetoyavuga kanuwagana. Yada dewa koyodi faidiya yogoyogodeyavo kamiyamiya aku Keliso dayagine gitutuveobuda, tainei yada koyona analaufata Banae gisena e ada yada koyona-dina Yaubada givenuwaegedi.[†] Yana nuwadoga ide wagaideya giavetavetala ani lakai-vagaina! E ada gikivemeyameyaganida ke kana nuwauya gaitoma moyaina wagaidiya ke yana vona vele-moena faina nuwada gina malina.

⁹ Tuwai-moena Tauna nuwainagene ginuwanuwa ke giveimeya, ada tainei yana nuwainage tuwaina-deya sewasewavuyena ani ide wagaideya gikiveyegemonina. Tauna nuwainagene giveimeya vaita yana nuwanuwa-nai gina ivemogatalina Keliso yana gugai wagaine, ada yana nuwanuwa-nai gikivemwamwalina.

¹⁰ Ada yana veimeya taidei anafaiweya. Gavatova givenuwadadanena wagaine gilubodana yana ibuibubuna matatabuna gabameya ke babiya ani gina vagauwi-tamwaidi adaToveimeya Keliso wagaine. Taidei anafaiweya yana veimeya-nai gisena, faina Keliso anakaibe-mowa debaida.

¹¹ E, Yaubada Banae gaitoma moyaina gifaisewadi yana nuwanuwa anafaiweya, ani nago-moena givenuwadadane-vagaida Banae

[†] **1:7-8** Kol 1:14, Lom 3:25

yana vutuvutuga. Ide Keliso nodi kaveseyana faina, tuwai-moena yana veimeya anafaiweya, ide yana vutuga iwaka-vagaina faina giveimeya-vagata.

¹² E ada ime amaduvetumagana Keliso wagaine ani yama dewa wagaidiya Yaubada yana iwakana mamalina ana kiveyegemonina ke moy-aidi Banae ina awadavadavana.

¹³ Ada imi kaduwe anafaiweya. Yana vona velemono, tainei amikibababala anavaleya iwakana wanogalina ke wavetumagana Keliso wagaine, e ani imi Keliso nodi waseyana ada Yaubada Aluwaluwa Tabuna-nai givonadabadabayena, ani givelemi ina gitalakilimi imi Banae yana kalivayavo.[†]

¹⁴ Taidei ide adaiyaiyaya vaita aimo adavutuga iwaka-vagaina givonadabadabayena ani kana nuwagana Banae wagaine-deya, ada Aluwaluwa-nai gina miyamiya yana yoo wagaideya analaba aimo yana yoo gikimoneda, ani gina tutuveobu-yabuda koyona wagaine-deya. E ada matatabu-moeda Yaubada yana iwakana mamalina kana awadavadavana.

Paulo giveoveola meEfeso tovetumagana faidiya.

¹⁵ Nagona yami vetumagana wasevelavelalaina yada Kauveya Yeisu wagaine, ada kaduwe Yaubada yana kalivayavo wanuwanuwak-abubuyedi ani Iya gakaiyanogala. Ada taidei vuvuna-nai

[†] 1:13 2Kol 1:22, Gug 19:2-6

¹⁶ gavebutu imi faimiya gavesivesiule kadu keke gada ilova, ada yaku veoveola wagaidiya tova moyaina amiyegana gainainana.

¹⁷ Gaveoveola ke yada Kauveya Yeisu Keliso yana Yaubada, Banae iwakana mamali-vagaina vuvuna, ani Aluwaluwana gina velemini e ada nuwami gina kivemalidi ke gina ivemogatalina Yaubada yana nuwanuwa wagaimiya, e ada Banae wana alamanena velemono.

¹⁸ Kaduwe gaveoveola ke nuwami gina kivemalina, e ada Yaubada yana nuwanuwa imi faimiya ani wana alamanedewedewena. Yana nuwanuwa taidei anafaiweya. Seyana, wana alamanena ani Yaubada givenuwadadanemi ke aimo gavana ginagana iwaka-vagaina faimiya, ani wa yami nuwavetumagana waveitabodebodena. Kaduwe seyana ani ide gavega Yaubada yana kaliva tabutabudeyavo, taine wagaideya adavutuvutuga faina givonadabadabayena, ani vutuvutuga-nai anakaikaiwabu lakai-vagaina!

¹⁹ Kaduwe nuwanuwaku wana alamanena vaita Yaubada yana toyogina lakai-vagaina wagaine tova moyaina gifaifaisewa ide anatovetumagana wagaideya. Keke tamo gavana wagaine kana awaluveluveye! Tainei yana toyogina lakai-vagaina wagaine,

²⁰ Yeisu Keliso gisiveyawana alikeya ke aiyatagine giveiyotona gabameya, ivi-nai wa anavemoimoina wagaine.[†]

²¹ Banae gabama getane-mwane givetoga ke gikaiwabu-mowa, e ada tokaiwabu, kaduwe

[†] 1:20 Ibel 1:3,13

toveimeya, kaduwe totoyogina, kaduwe kauveya tulina tulina ani gikaiwabusege-moedi.† Kaduwe Banae anayegana lakai-moena, ada gavega adiyegana kaliva ikikilakaidi, badi Keliso gikaiwabusegedi, ada keke vaita taidei tova-nai gagana wagaine aku kaduwe tova mulina nodi.†

²² Yaubada ani gaitoma matatabuna gisedi Keliso age yavavane, ada Banae givenuwadadanena ke gaitoma matatabuna gina veimeyedi. E ada ide gavega Keliso anatovetumaganayavo ani Banae adaToitaveyabina anakaibe-mowa.

²³ E ada ideyavo yana ekalesiya ani vaita Keliso vovona anafaiweya aku Banae ani debaida.† Ada ide vovona ani debaida Keliso kaluyabuna, aku Banae Tauna gaitoma moyaina givemagadi fafali matatabuna wagaidiya, ke ide nodi givemagamoeda ke giluyabuda.

2

Yaubada yana nuwadogeya gikibababaleda.

¹ Aku imiyavo ani tova giavaina muliya-yo wavetumagana Keliso wagaine, imi vaita toalika anafaiweya, faina Yaubada yana veimeya wayaweyawelina ada dewa koyona wagaine waawaawaegemi.†

² Yami miyami wagaine babi ananuwanuwa wamulimuliyena ada Seitani wamatawalewaleyena, banae aluwaluwa bwanebwanenedi yadi kaiwabu giveiveimeya mwatugu wagaine. Banae aluwaluwa-nai malinai gifaifaisewa badi

† 1:21 Fip 2:9-10 † 1:21 Kol 2:15 † 1:23 1Kol 11:3, Kol 1:18

† 2:1 Kol 2:13

gavega Yaubada yana veimeya idibusoyogena ani wagaidiya.†

³ Tuwaina ide matatabuda kaduwe togadibudibusoyoga-dina adiyoo anakali-vayavo. Taudeyavo kaawaegeda vovo ananuwanuwa wagaine, e ada au tova moyaina koyona kafaifaisewadi anafaiweya vovoda ananuwanuwa ada nuwada givaina.† Yada tubuga wagaine-deya ide tova moyaina kakoyokoyona, e ada adalauboda Yaubada wa yana nuwakoyo gina vematavulogida, anafaiweya togadibudibusoyoga moyaidi.

⁴ Aku Yaubada Banae Tonuwakalikali vele-moena, ada ginuwakabubuyeda lakai-vagaina faina,

⁵ Keliso alikeya gisiveyawana anafaiweya, ide alialikada gisiveyawada ke Keliso nodi wayawaida evaguna kamiyamiya. Velemoena yada dewa koyona faina, ide vaita alialikada anafaiweya kamiyamiya nonogana Yaubada yawaida evaguna giveleda. Yaubada yana nuwadoga keke kanavona! Waitana, yana nuwadoga wagaine kibababala kanuwagana,

⁶ ada ide Yeisu Keliso nodi kaveseyana faina, Yaubada gisivemididi-tamwaida Keliso nodi, ada Banae nodi giveiyotoda gabameya.

⁷ Taidei anafaiweya Yaubada ide Keliso nodi giveiyoto-tamwaida e ada tova gielaelai yana nuwadoga lakai-vagaina ide wagaideya gina seyegemonena. Ide giitanuwakabubuyeda ke Yeisu Keliso nodi kaveseyana faina, yana nuwadoga gavatubuga! Keke adafaiweya

† 2:2 Efes 6:12 † 2:3 Tai 3:3

kana etowava.

⁸ Faina Yaubada wa yana nuwadoga gilememi e ada yami vetumagana wagaine amikibababala wanuwigana.[†] Aku keke taumiyavo nuwamiya vetumagana gida yegemo, au vetumagana-nai ani aminuwakabubu Yaubada givelemi.

⁹ Keke taumiyavo yami vediwe o kai yami gugai wagaine amikibababala wada nuwaga, aku Yaubada yana nuwakabubu wagaine wanuwigana.[†] E ada keke tamo gaito wa vuvuna ayo gina gakaikai, ginavona, “Iya tauku yaku gugai wagaine akukibababala ganuwagana.”

¹⁰ Faina ideyavo ani Bana Yaubada nimana anaiyaiyaya. Ide gavana kanagai? Yaubada gibubuda ada kaveevagu Yeisu Keliso wagaine ke gugai iwakadi kana seyegeyegemonedi yana nuwanuwa anafaiweya.[†] Tainei gugai-dina ani tuwai-vagaina Yaubada gikidewadewa-vagaina ke yada miyami wagaidiya kada dewadewa anafaiweya.

Veseyana Keliso wagaine-deya.

¹¹ Tainei faina wana nuwaududuna yami miyami tova tuwaina wagaine. Imiyavo ani keke wada tubuga Isileli anaunuma wagaine, e ada badi meIsileli tomogolota anagiduwa imulimuliyena ani ivewagami ‘imi tomogolota anagiduwa keke wada muliye’.[†] Aku ida iyaiyaya-nai vovo bubuna bwatana anatomogolota ani wada au kaliva taudiyavo

[†] **2:8** Lom 3:24, 2Tim 1:9 [†] **2:9** Tai 3:5 [†] **2:10** Tai 2:14 [†] **2:11** Eba 17:10-27, Iyeg 12:48, Luk 1:59 ke anaailabama adiebakivemala

nimadiya ivevegugaiyena. Vovo wamelaleya isivedavedamena aku keke asease.

¹² Yami miyami tuwaina keke nuwami ginavulu. Imi keke Keliso wagaine wada luveyabina, ada keke nodi wada veyavo. Kaduwe imi keke Yaubada yana yoo anafaiweya meIsileli. Tuwai-moena ani ime meIsileli Yaubada givenuwadadanema, ada yana veyavo anawai anavonadabadaba gisena wagaimeya. Aku imi keke taidei anafaiweya gida veyavoyemi. Wamiyamiya idedeku babi wagaine aku keke Yaubada wadaalamane, kaduwe keke wada vetumagana vaita kibababala wana nuwagana.

¹³ Aku imi nagona wamiya atuwada Yaubada wagaine-deya ani tova malinai Keliso dayagina gimadu faina, Yaubada gialiyemi Tauna lilivane e ada Yeisu Keliso nodi waveseyana.

¹⁴ Faina Banae Tauna adaTokukuya, ada ime meIsileli kaduwe imi keke meIsileli aku Keliso givagauwida ke nodi kaveyoo seyana. Ime amaveimeya ke amaawata Mosese gisedi ani imi keke wada itaveyabi faina, kavenibaina. E ada vaita kali gida miyami nefanideya ke givemiyadakada yoo iluwei anafaiweya. Tainei anafaiweya kavevenibaina aku Keliso yana alika wagaine venibaina anakali giyawelina.

¹⁵ Banae vovona giawaegena wagaine, Mosese yana veimeya giyawelina e ada ime meIsileli ke imi keke meIsileli kana veyoo seyana.[†] E ada Keliso yana gugai wagaine, ide yoo iluwei aku yoo seyana evaguna katubuyegemona, ada taidei

[†] 2:15 Kol 2:14

anafaiweya kukuya wagaine kana miyamiya.

¹⁶ Tuwaina yoo iluwei kavenibaina imeyavo ke imiyavo, aku Keliso yana alika kelose wagaine yoo-dana iluwei giveseyana-vagileda Yaubada nodi, e ada ideyavo yoo seyanaga ani Banae nodi kaveyoo. E ada yada venibaina-nai givaiyavulena.[†]

¹⁷ Ada Keliso gielai babi taidei wagaine ke kukuya anavaleya iwakana gilumamalena imi keke meIsileli ani Yaubada wagaine-deya wamiya tabae-mwane, ada kaduwe ime meIsileli wagaimeya ani au Yaubada lilivane-mwane amiyamiya. E, moyaida wagaideya valeya-nai gilumamalena.

¹⁸ Keliso Banae yada wai gifaisewana e ada Banae wagaine yada yoo iluwei adafaiweya kana yegeyegemona Tamada matane. Imeyavo ke imiyavo ani Yaubada Aluwaluwana seyana-nai nuwainagedeya gimiyamiya ayo Tamada matane kayegeyegemona.

¹⁹ Taidei anafaiweya Keliso givetutamwaida kaveseyana faina, imi keke vaita aimo imi awaawala anafaiweya, aku aiyada imiyavo bade-mowa waluku Yaubada yana gabu anakalivayavo wagaidiya. E ada imiyavo ke imeyavo ani matatabuda yana kaliva tabutabudeyavo nodi kamiyamiya.

Ide Yaubada yana yoo ani vaita yana manuwa anafaiweya.

²⁰ Ide Yaubada yana yoo ani vaita yana manuwa. Banae Yeisu Keliso Tauna manuwa

[†] 2:16 Kol 1:20

anaunututu, ada ime afositolo ke badi falofitayavo ani manuwa-nai anaogola.† Ada imi gavega Yaubada yana yoo, imi manuwa-nai luluna anafaiweya giyyogoyogonemi.

²¹ Ada Banae unutu-nai wagaine Yaubada manuwa-nai matatabuna gietovefovefosedo ke manuwa-nai giveiveinala e ada givevemanuwa tabutabuna yada Kauveya yana veimeya dibune.†

²² Ada kadu imiyavo Keliso nodi waveseyana ani Yaubada giyyogoyogomi, e ada ime moyaima nodi giyyogoyogoda seyana ke ide moyaida yana ebamiya. E ada ide wagaideya Banae gimiyamiya Aluwaluwa Tabuna wagaine.†

3

Yaubada yana nuwanuwa sewasewavuyena Paulo giivemogatalina badi keke meIsileli waggaidiya.

¹ Ada imi keke meIsileli ke ime meIsileli ani Yaubada yana manuwa wagaine giyyogoda seyana faina, Iya Paulo gaveoveola Yaubada wagaine imi faimiya. Iya Yeisu Keliso anavaleya iwakana gaawaawamogatalena imi keke meIsileli waggaimiya faina, iseku deliya ke Iya Keliso yana kaliva yogoyogoku gamiyamiya.†

² Kai valeyaku bademowa wanogalina, ina Yaubada wa yana nuwadoga givenuwadadaneku ke akuveimeya giveleku ada gana gugai imi keke meIsileli faimiya amileme faina.

† 2:20 Mad 16:18, 1Kol 3:11 † 2:21 1Kol 3:16, Kol 2:19 † 2:22 2Kol 6:16 † 3:1 Efes 4:1, Fip 1:13, Gug 23:18

³ Yaubada yana nuwanuwa-nai sewasewavuyena ani keke tauku yaku nuwauya wagaine gada alamanane, aku Yaubada giivemogatalina Iya wagaikuya.** Yami leta wagaine kabisona bademowa gaifufuyena.

⁴ Kai yaku vona wana veyawana, aga yaku nuwamala tainei nuwanuwa-nai sewasewavuyena Keliso faine wana alamanena.†

⁵ Yaubada yana nuwanuwa sewasewavuyena ani keke gida ivemogatali badi tova tuwaina anakalivayavo wagaidiya. Aku tova malinai ime yana afositoloyavo kadu yana falofitayavo ani wagaimeya giawamogatalena Aluwaluwa Tabuna wagaine.

⁶ Tainei nuwanuwa-nai sewasewavuyena ani taidei anafaiweya. Keke ime meIsileli gagana amavutuga anavai, aku kaduwe imi keke meIsileli ani nodi moyaida adavutuga kana vaina aigaigabuya Yaubada wagainedeya. Kaduwe, imiyavo ke imeyavo ani nodi kaveyoo seyana, ada gavana iwakana Yaubada givonadabadabayena yana kalivayavo wagaidiya ani moyaida kana nuwagana, faina imi bademowa Keliso nodi waveseyana.† Tainei ani valeyawakana ananuwanuwa anafaiweya.

⁷ Valeyawakana iwakana faina, Yaubada

** **3:3** Tainei nuwanuwa-nai sewasewavuyena ani ananuwanuwa taidei anafaiweya. Keliso ani wai giyavuyavuna ke gikivemeyameyaganina e ada badi keke meIsileli ina vetutamwata Yaubada yana yoo, tainei meIsileli nodi, ada Yaubada yana vonadabadaba-dina yawai-vagata faina badi meIsileli wagaidiya ani kaduwe badi keke meIsileli faidiya.

† **3:4** Kol 1:26-27 † **3:6** Efes 2:13,19

yana nuwadogeya givenuwadadaneku ke gavetogugai,[†] ada toyogina giveleku e ada taidei akuveimeya-nai akufaiweya gana gugaiyena.

⁸ Iyayeku ani Yaubada yana kaliva tabutabudiyavo wagaidiya au akuita kabisona nonogana Yaubada yana nuwadoga wagaine gugai taidei giveleku ke imi keke melsileli wagaimiya gana lulumamalena Keliso yana kaikaiwabu iwakadi.[†] Taidei kaikaiwabu-nai moyai-vagina, keke adafaiweya kana alamane-yabu.

⁹ Kaduwe Yaubada akuveimeya giveleku ke tomiyababi moyaidi nuwadi gana kivemalina Yaubada yana nuwanuwa sewasewavuyena faina. Nuwanuwa-nai tuwai-bulubuluna tutuya gavaiyei bademowa kasegedi wagaidiya ada gielai malinai ani sewasewavuyena Yaubada nuwainagene, Banae gaitoma matatabuna adiToibubuna.

¹⁰ Aku tova malinai Yaubada yana nuwanuwa sewasewavuyena giivemogatalina, e ada kaiwabuyavo ke totoyogina mwatuguya ani Banae yana nuwauya adiita tulina tulina gina vewaledi ke ina itanuwagana. Aku gadedeku wagaine taidei yana nuwauya-nai tulina tulina ina itanuwaga? Ide toekalesiya kaveseyana ke adayegana Yaubada yana kalivayavo ani wagaideya.

¹¹ Muliya-yo Yaubada babi gibubuna, gin-uwanuwa taidei gaitoma-dina gina gugaiyedi, ada giyegemona anafaiweya yana nuwanuwa, ani Yeisu Keliso yada Kauveya wagaine.

[†] 3:7 Kol 1:25 [†] 3:8 1Kol 15:9-10

¹² Ide Banae kavetumagana wagaine ada nodi kaveseyana faina, wai Yaubada wagaine ani yavuyavuna ide wagaideya. E ada adafaiweya veoveola wagaine wa yada asevatu nodi kana yegemona wagaine.†

¹³ Tainei faina, imi waalamanena Iya uloulolo ganuwanuwagadi, aku gaveola wagaimiya ke yami vetumagana wagaidiya keke dibumi gina soyoga. Faina imi faimiya wa yaku sefaga gaulouloloyedi,† tainei ani imi amivemoimoina faina.

Paulo yana veoveola meEfeso tovetumagana faidiya.

¹⁴ Taidei faina, Yaubada Tamada matane tugaku gavetodonena ke gaoduodu wagaine,

¹⁵ Banae wagaine-deya ide yana gabuyavo gabameya ke babiya ani matatabuda adayegana kavaina.

¹⁶ Ada gaveoveola imi faimiya ke Banae ani yana iwakana mamalina ke yana kaikaiwabunai moyai-vagaina wagaine-deya, yana toyogina gina velemini ke nuwainagemiya wana toyogina Banae Aluwaluwana wagaine.

¹⁷ E ada yami vetumagana wagaine Keliso gina vemanuwa aseasemiya.† Kaduwe gaveoveola ke wana toyogina yami nuwakabubu wagaidiya. Anafaiweya ai walamina giobu-mowa babi wagaine ada gimidimididi toyogina, taidei anafaiweya gilubodana wana midimididi toyogina nuwakabubu wagaine. E, yami gugai vuvuna ani Yaubada yana nuwakabubu faimiya.

† 3:12 Efes 2:18, Ibel 4:16 † 3:13 2Tim 2:10 † 3:17 Kol 2:7

¹⁸ E ada imiyavo ke badi gavega Yaubada yana yoo nodi ani nuwami gina malina Keliso yana nuwakabubu faina. Keke kanavona! Yana nuwakabubu faideya ani lakai-vagaina. Nuwakabubu-nai anavelalafa, anavemanawe ke anaobu ada analaka ani keke adafaiweya kana etowawa.

¹⁹ E ada gaveola ke Keliso yana nuwakabubu ide keke adafaiweya kana alamane-yabu ani wana lutovonina ke anaalamana wagaimiya gina veinala,[†] e ada Yaubada Tauna gina vedodoga lakalakata wagaimiya ke gina vemaga-moemi.

²⁰ E ada Banae kana awadavadavana. Yana toyogina nuwainagedeya gifaifaisewa faina,[†] gavaiyamu Banae wagaine kana veola o kai kana nuwanuwayena faine, tainei anafaiweya gina gugaiyena faideya, aku yana gugai-dina ani yada veola o kai yada nuwanuwa itubusegedi.

²¹ Yaubada anayegana kana kikilakaina! Banae anadava ginuwanuwagana ide yana ekalesiya anayoo wagaideya ada kaduwe Yeisu Keliso wagaine, ada yoo yoo aimo tova ielaelai ina tubuga ani wagaidiya, keke ginaavai, ginamiya-vagata. Ika anafaiweya.

4

Veseyana wagaine nodi kana miyamiya.

¹ Iya yada Kauveya faine iyogoku ke yogoyogoku gamiyamiya ani gavonavona vagadonemi. Imi bademowa waalamanena gaitoma iwakadi Keliso gigugaiyedi faimiya, e ada gilubodami

[†] 3:19 Iyo 14:23 [†] 3:20 Kol 1:29

yawaimi wagaidiya wanadewa iwakana Tauna yana yoo adilauboda† anafaiweya. Taidei faina givenuwadadanemi.

² Tova moyaina wa yami nuwaobu nodi wanadewa bikana, ada kai tamo gaito yana dewa keke iwakana matamiya aga au wa yami nuwakabubu wana atuvefailena.†

³ Aluwaluwa Tabuna wagaine waveseyana, e ada yami nuwanuwa wanasena toyogina yami awavetubuiyana seyana seyana wagaidiya ke wanamiya aigaigabu kukuya wagaine.†

⁴ Ide matatabuda Keliso vovona ani seya-moena, ada Aluwaluwana seya-moena. Ada anafaiweya vovo seya-moena ke Aluwaluwana seya-moena, kaduwe yada ebanuwavetumagana seya-moena.† Nagona Yaubada gidouweda ke kanuwavetumagana gaitoma seya-moena wagaine, tainei Yaubada gina kibababale-yabuda.

⁵ Kaduwe yada Kauveya seya-moena, yada vetumagana seya-moena, ke yada babitaiso seya-moena.

⁶ Ada ide matatabuda yada Yaubada, Banae Tamada, ani seya-moena. Banae giveiveimeya matatabuda wagaideya, ada matatabuda wagaideya Banae gifafaisewa, ada matatabuda nuwainagedeya gimiyamiya.

⁷ E ada ide seyana seyana faideya Keliso adanuwakabubu tulina tulina gietowavana ke wa yana nuwadoga yana leme giveda yana venuwadadana anafaiweya.†

† 4:1 Kol 1:10 † 4:2 Kol 3:12-13 † 4:3 Lom 12:16-18, 1Pi 3:8

† 4:4 1Kol 12:12-13 † 4:7 Lom 12:3,6

⁸ Taidei faina Buki Tabu wagaine ivetokilumina ani givona,

“Banae nibainavo gitoyogisegedi ke gilaka
fafali getane-mwane
ada nibainavo yogoyogonidiyavo gilutune-
tunedu imuliyena,
ada yana nuwakabubu givutugedi kaliva wa-
gaidiya.” †

⁹ Vona taidei ‘gilaka’ ani gavana anaalamana? Ananuamamala taidei anafaiweya. Nago-
moena bademowa giobuelai babi taidei wa-
gaine.**

¹⁰ Ada Banae giobuelai ani Kaliva-nai kaduwe
gilaka gabama getadiya-mwaeya, e ada gabama
ke babi ada fafali matatabu-moena wagaidiya
Tauna gina miyamiya.

¹¹ Ada yana nuwakabubu-dina giavetavetala
kaliva wagaidiya ani taidei anafaiweya. Kaliva
tufodi givenuwadanedu ke ina veafositolo,
tufodi falofita badiyavo Yaubada yana
nuwanuwa anatoawatalatalaina, tufodi Valeya
Iwakana ina lumamala-dadanena. Ada tufodi
Yaubada yana kalivayavo aditoitaveyabina, kadu
tufodi yadi tovewala.†

¹² Keliso bademowa tayuwe nuwakabubu-dina
givutugedi wagaideya e ada ide Yaubada yana
kaliva tabutabudeyavo ina kidewadewada ke

† 4:8 Sam 68:18 ** 4:9 Maita taidei anaebalaulyabu wagaine
ani kadu ananuwanuwa seyana, anafaiweya ‘aku kaduwe giobu
babi anafafali dibune-mwane.’ † 4:11 1Kol 12:28

ekalesiya anagugai kana idibumwaigena, e ada ide Keliso vovona† matatabuda ina kikipetoyogida† anafaiweya yana nuwanuwa.

13 Ide matatabuda kana toyogina ada taidei anafaiweya ginanau ginanau analaba yada vetumagana wagaine kaelai seya-moena, ada yada alamana Yaubada Natuna faine seya-moena. Keliso Banae nuwanuwa iwakanaga wagaine gimaga-mowa ke giasekumagedi anafaiweya, ideyavo yana nuwanuwa iwakanaga wagaine kana maga-mowa ke kana asekumagedi.†

14 Kai ide kana asekumaga anafaiweya Keliso, keke maita aimo kanadewa bebeta anafaiweya.† Dewa-nai wagaine tova moyaina vewala tulina tulina kamulimuliyedi, anafaiweya mala gi-madumadu ada buli waka giluvilavila-nauwedi. Kaliva tofwaya golagola badi fwaya ivevewala ke vewala-dina wagaidiya nuwanuwadi ina vedaida e ada wai tunutunugina taidei kana segena. Aku kai kana asekumaga, aga keke taudeyavo kana awaegeda wagaidiya ada keke yadi vewala balana kana vetumagane.

15 Keke, keke kanadewa anafaiweya, aku aiyada ide wa yada nuwakabubu kana vonavona vele-moena, ada yada dewa moyaina wagaine Keliso anaitaita anafaiweya kana veiveinala.† Taidei Keliso-nai Banae ani ide ekalesiya debaida.

16 Vovoda anatalai tulina tulina ani waloga gitubodi ke gikiveyabi-tamwaidi, aku kuluwada ani vovoda matatabuna giitaitaveyabina e ada

† 4:12 1Kol 12:27 † 4:12 1Kol 14:12 † 4:13 Kol 1:28 † 4:14 1Kol 14:20 † 4:15 Efes 4:25

talaida ifaifaisewa ke vovoda matatabuna itubu-tubuga ke itoyotoyogina. Ada tainei anafaiweya Keliso debaida. Ide vovona giitaitaveyabida ke gilemelemeda ada kana gugai aigaigabu e ada vovona gina tubutubuga.[†] Ideyavo ani vovona anatalai seyana seyana e ani faisewadina Yaubada giveleveleda kana vegugaiyedi ada yana lemeya kana venuwanuwakabubu, e ada kana asekumaga yana nuwanuwa anafaiweya.

Dewa yuyuvana kana dibusoyogena aku kanamiya malina wagaine.

¹⁷ Aku imi Keliso vovona faina, Iya Kauveya yana kaliva ani imi wagaimiya Banae matane gavonavona. Keke gida luboda aimo wana dewadewa anafaiweya badi keke meIsileli, badi keke Yaubada ida alamane. Biyavodina gaitoma-kavokavovo inuwanuwayedi tova moyaina ke ivetumaganedi vaita yawaidi ina kiveiwakanedi ke ebavemwamwala ina nuwagana wagaidiya.

¹⁸ Badi aseasedi ikuga e ada Yaubada yana wai keke ida alamane, ada taidei faina yawai-vagata Yaubada giavetavetalayena ani imiyamiya atuwada wagaine ke yadi nuwanuwa yuyuvanina.

¹⁹ Tova-nai koyona igugugaiyedi wagaine yadi nuwanuwa itufa ayo keke maita ida vovomumu, e ada taudiyavo iawaenge-moedi gavana vovo ananuwanuwa wagaidiya. Ada dewa koyona tulina tulina matatabuna igugugaiyedi, keke maita ida iloilova.

[†] 4:16 Kol 2:19

²⁰ Aku imiyavo wasikulu Keliso wagaine ani anaalamana keke tainei dewa-nai koyo-moena anafaiweya.

²¹ Gaalamanena Yeisu valeyana wanogalina, ada imi yana tonogalayavo faina, vona vele-moena Yeisu givewaleda wagaine imi vewala wavaina yawai iwakana faina.

²² Ada vewala-nai taidei anafaiweya. Tuwaina imi aimo keke Keliso wagaine wada vetumagana anatoveya, taumiyavo yami nuwanuwa wagaidiya wakoyokoyona. Yami nuwanuwa luluvadigadi ifwayami ke nuwami gidigagi-vagaina aku gikikivekoyomi. E ada vewala-nai wavaina ani givewaleda vaita dewa-dina tuwaina wagugugaiyedi, ani gilubodami wana segedi

²³ aku taumiyavo wana awaegemi Yaubada wagaine e ada yami dewa ina veveevagu.†

²⁴ Ebaita wamo tubutubuna giafuwana ada bavagu wagaine ginau anafaiweya, imi tubutubumi wana segena ke nuwami evaguna wana osena. E ada wana awaegemi ke Yaubada aseasemi kaduwe nuwami gina kiveevaguna. Ada ina nuwami evaguna kai kanavona vaita kaliva evaguna ani Yaubada Tauna anaitaita yegayegana kaduwe tabutabuna vele-moena mamauwe, gibubuna e ada Banae anafaiweya wanadewa.

²⁵ Ada imi kaliva ke vevine waveevagu Keliso anafaiweya faina, vefwayafwaya matatabuna wana ilovena aku imi seyana seyana tubuiyamiyavo wagaidiya wanavona

† 4:23 Lom 12:2, Kol 3:9-10

velemoena.† Faina ide anafaiweya talai tulina tulina aku vovo seyana, moyaida kavegabu seyana Keliso vovona wagaine.**

26 Kai wana nuwakoyo, aga wana itaveyabimi keke wanadewa koyona. Yami nuwakoyo gina maduavaina aku keke ginana mala ginabogi.

27 E ada keke maita mwatugu kabiso-moena wana awaege Seitani wagaine aenanai mwatugunai wagaine gina mididi ke anafata kadu mwatugu seyana gina vaina wagaimiya-deya, e ada ginanau-deya gina vetoyogina.

28 Gavakaliva gikiyakiyafu ani kiyafu gina ilovena aku aiyada gina faifaisewa.† Ee, tauna nimana gina vegugaiyedi faisewa iwakana wagaine e ada anafata tauna yana giba wagaine gina avetavetala banae gaito gavana wagaine givemaufu.†

29 Vona koyona keke wana awaege gina yegemona awamiya, aku aiyada gavavona wanuwawanuwa vaita badi inoganogalimi gina lemedi ani wana vonayena. E ada yami vona ananogala vaita Yaubada yana nuwadogeya wavonavona wagaidiya.†

30 Ada keke Aluwaluwa Tabuna wana kivenuwavita.† Faina Yaubada Aluwaluwa

† 4:25 Efes 4:15 ** 4:25 Kai kana fwaya o kai kanadewa koyona tubuiyada tovetumagana wagaine, keke banae gagana kana kiveulouloloni aku Keliso vovona kaduwe. Faina ide seyana seyana Keliso vovona anatalai tulina tulina, e ada ide wa yada nuwakabubu tubuiyadeyavo tovetumagana kada itaveyabidi.

† 4:28 Mad 19:18, Mak 10:19 † 4:28 Gug 20:35 † 4:29 Mad 12:36, Efes 5:4, Kol 4:6 † 4:30 Ais 63:10

Tabuna givilemi ke wagaine gitalakilimi aimo yadayada-nai gina tutuveobu-yabuda faina.†

31 Keke wana nuwakoyo-golagola, keke wana imanimanini yami nuwakoyo wagaine, ada nuwakoyo aseasemiya wana segedi. Keke wana gavekwavekwageya, keke kaliva wana veloi e ada adiyegana wana kikivekoyo, kadu keke wana nuwainage gavakaliva anakivekoyo faina. Dewa tulina tulina anafaiweya ani matatabuna wana dibusoyogedi.†

32 Aku nodi wana venuwanuwakabubu kaduwe nodi wana venuwakalikali. Ada Yaubada Keliso wagaine yami koyona givenuwaegedi anafaiweya, imiyavo kaduwe kaliva yadi dewa koyona igugaiyedi wagaimiya ani wana venuwaegedi.†

5

Yawai evaguna Keliso wagaine.

1 Aku Yaubada yami koyona givenuwaegedi ada ginuwakabubuyemi anafaiweya natu aseasenavo faina, Tamami wana gaveuveulena.

2 Kevakeva ivebolavoiyena ke magana iwakana gilaka Yaubada giyauna anafaiweya, Keliso Tauna giawaegena alika wagaine ide faideya, ada yana vebolavoi ani iwakana ke ebavemwamwala Yaubada wagaine.† E ada Keliso ginuwakabubuyeda ke yawaina giawaegena faideya anafaiweya, imi gilubodami

† 4:30 Efes 1:13-14 † 4:31 Kol 3:8 † 4:32 Kol 3:12-13 † 5:2 Iyeg 29:18,25,41, Vei 1:9,13,17

yawaimi matatabuna wagaidiya wana dewadewa wa yami nuwakabubu nodi.†

³ Aku vovo anaawaege-kavokavovo tulina tulina ke nuwanuwa bwanebwanenena ani matatabuna wana dibusoyoge-yabuna, ada kaduwe keke giba wana itaitaluvadige. Keke-mowa wanadewa anafaiweya e ada kaliva adifaiweya valeya koyona ina ifuifufuye vaita gaito seyana wagaimiya gidewadewa anafaiweya. Faina imiyavo Yaubada yana kaliva tabutabumiyavo.

⁴ Kaduwe, keke gida lubodami wanavona bwanebwanenena o kai wana awavekwavakwava o kai wanavona awaveleiga dewa koyona faina.† Aku aiyada yami vona wagaine Yaubada wana vesivesiuleyena.†

⁵ Ada gilubodami wana alamanena vaita badi gavega toudo, o kai tosedada, o kai vovo ananuwanuwa bwanebwanenena wagaine iawaegedi, o kai giba itaitaluvadigedi, ani biyavo-dina keke-mowa inaluku Keliso ke Yaubada yadi ebaveimeya wagaine ke gaitoma iwakadi ina nuwagadi anafaiweya Yaubada givonadabadabayena.† Biyavo-dina giba itaitaluvadigedi ani anafaiweya ioduodu yaubada fwayafwaya wagaidiya, faina giba-dina nuwadi givai-vagina.

⁶ Wana itaveyabimi keke tamo gaito vona kavokavovo wagaine gina fwayamikamiki. Faina taidei dewa-dina badi igugugaiyedi ani Yaubada yana nuwanuwa idibusoyogedi, e

† 5:2 Iyo 3:16, Fip 4:18 † 5:4 Tol 10:12-13 † 5:4 Efes 4:29 † 5:5 1Kol 6:9-10

ada Yaubada yana nuwakoyo lakaina wagaine gina vematavulogidi.†

7 Tainei faina badi todibusoyoga keke nodi wana luluveya.

8 Faina tuwaina imi yuyuvana anakalivayavo ada wakoyokoyona, aku malinai imi Kauveya nodi waveseyana ada imi malina anakalivayavo.† E ada malina anabiyavo anafaiweya wanadewa.†

9 Faina malina guwana ani dewa iwakana, dewa yegayegana, ada vona velemono.

10 Ada wana galuvaluwa ke wana alamanena gaitoma-dina Kauveya ikivemwamwalina.†

11 Aku badiyavo keke Yaubada ida muliye ke yadi dewa yuyuvana ani keke wana gaveuveuledi aku yadi dewa-dina wana dibusoyogedi, wada keke wa adiguwa iwakana. Aku aiyada kaliva idewadewayedi ani wana awavetuvetunugidi e ada moyaidi ina alamanena vaita dewa-dina ani koyodi.†

12 Faina tayuwe dewa-dina yuyuvana ikavuya ifaifaisewadi ani kai gaito seyana gina ifuifufuyena, wada ebavovomumu lakaina.

13 Aku gavana kana awavetunugina ke Kauveya yana malina gina kuvemalina ani matatabuna adi-ita velemono gina yegemona, kai iwakana o kai koyona.

14 Faina kai gaitoma seyana yuyuvana wagaine gina miyamiya aku malina gina kuvemalina, aga gaitoma-nai kaduwe gina malina. Taidei faina yada vona seyana givona,

† 5:6 Lom 1:18 † 5:8 Kol 1:13 † 5:8 1Pi 2:9 † 5:10 Lom 12:2

† 5:11 Iyo 3:20, 1Tim 5:20

“Imi waenowavulu ani wana enovilami.†
Wanayawa-vagila alikeya
e ada Keliso yana maline gina malimi.” †

15 Tainei faina, yami dewa wana itaveyabidi.
Keke wana dewadewa anafaiweya badi keke
tonuwanuwa velemono aku aiyada tova moy-
aina wana vetonuwanuwa velemono.

16 Tova taidei wagaine koyona gitubuga-mowa
faina, keke wanamiya-kavokavovo aku tova-
nai gugai iwakadi anatova wana nuwagadi, aga
wana gugugaiyedi.†

17 Taidei faina keke wana vekwawakwava, aku
aiyada wana galuvaluva ke nuwami gina malina
gavana Kauveya yana nuwanuwa.†

18 Kaduwe, keke wanayuga kwavakwava gufa
toyogina wagaine, faina yuga kwavakwava
wagaine aimo wana gadawedawelo ada
yawaimi gina kikivekoyona. Aku aiyada tova
moyaina wana awaegemi ke Aluwaluwa Tabuna
gina vemagami.†

19 Yami ifufu wagaidiya Same tulina tulina
wana veifuifufuyedi, kaduwe Yaubada anakweli
davadava ivetokilumina wana kwelikweliyedi,
ke kaduwe kweli-dina Aluwaluwa Tabuna
gina alavelelelemini ani wana kwelikweliyedi, ada
wa yami vemwamwala aseasemiya wana kweli
davadava Kauveya wagaine.†

20 Ada tova moyaina gaitoma moyaina faidiya
wana vesivesiule Yaubada Tamada wagaine yada
Kauveya Yeisu Keliso anayeganeya.†

† 5:14 Lom 13:11 † 5:14 2Kol 4:6, Efes 2:1 † 5:16 Kol 4:5

† 5:17 Kol 1:9 † 5:18 Lom 13:13-14, 8:6 † 5:19 Kol 3:16-17

† 5:20 Kol 1:12, 3:17

Nagi anaveimeya.

²¹ Imiyavo wa yami matauta Keliso wavemoimoinena, e ada imi seyana seyana tubuiyamiyavo bonadi wana noganogalidi.

²² Imi vevine naginagimiyavo ani anafaiweya bademowa wasemi amiToveimeya Yeisu yana veimeya dibune, kaduwe anafaiweya moganemiyavo yadi veimeya dibune wanamiya kenuwana.†

²³ Faina Keliso ani ekalesiya debaina anafaiweya, kaliva ani vavinena debaina.† Ekalesiya ani Keliso vovona, ada Keliso Banae vovo anaTokibababala.

²⁴ Ide Keliso yana ekalesiya ada taudeyavo kaseda yana veimeya dibune ke yana nuwanuwa kagugugaiyedi anafaiweya, imi vevine naginagi kaduwe gilubodami taumiyavo wadasemi moganemiyavo yadi veimeya dibudiya, ada gavana ina veimeya ani wana matawalewaleyedi.

²⁵ E aku imi kaliva naginagimiyavo ani ganavona wagaimiya. Keliso ide yana yoo ginuwakabubuyeda ada Tauna yawaina giawaegena faideya, ada kadu anafaiweya imiyavo ani wa aseasemi vavinemiyavo wana nuwakabubuyedi.†

²⁶ Keliso yawaina giawaegena faideya e ada aseaseda gina kolakoladi yana vona anagufa wagaine,† ada taidei anafaiweya gina kiveyegayeganeda ke gina seliyeda Tauna faine.†

† 5:22 Kol 3:18, 1Pi 3:1 † 5:23 1Kol 11:3 † 5:25 Kol 3:19, 1Pi 3:7 † 5:26 Iyo 15:3 † 5:26 Ibel 10:10

27 Kaduwe, Tauna giawaegena faideya e ada matatabuda gina aliya yana yoo wagaine, e ada ideyavo ani yana ekalesiya iwaka-vagina gina kiveyegemonida Tauna wagaine. Nuwanuwana ide keke maita wa yada nuwanuwa koyona kana miyami, aku velemoena ide au vetavetabuda ke yegayega-moeda kana miyamiya Banae matane.†

28 Taidei anafaiweya imi kaliva faimiya. Taumiyavo vovomi wanuwakabubuyedi anafaiweya, imi kaduwe gilubodami vavinemiyavo wana nuwakabubuyedi.† Kai taidei anafaiweya kaliva vavinena ginuwakabubuyedi, aga banae tauna ginuwakabubuyena.

29 Waitana, keke tamo tova kaliva tauna vovona gida awaidiye, aku gina vekavekanina ke gina itaveyabi-dewedewena. Ada taidei anafaiweya Keliso wa yana nuwakabubu yana ekalesiya giitaitaveyabida,

30 faina ide matatabuda vovona anatalai tulina.†

31 Anafaiweya gavega tonagi faidiya ani ive-tokilumina Buki Tabu wagaine, givona, “Kaliva inana ke tamana gina miyasegedi aku ginanau ada vavinena nodi ina miyaluga ke ina vevovo seyana.” †

32 Taidei vona-nai wagaine ani wa ananuamamala vitana, givonaluvefosau Keliso ke yana yoo faidiya.

33 E aku imi kaduwe ani kaliva seyana seyana taumiyavo wanuwakabubuyemi

† 5:27 2Kol 11:2 † 5:28 Eba 2:24 † 5:30 1Kol 12:27 † 5:31 Eba 2:23-24, Mad 19:5-6, Mak 10:7-9, 1Kol 6:16

anafaiweya, gilubodami kaduwe vavinemiyavo wana nuwakabubuyedi. Ada kaduwe imi vevine naginagi seyana seyana ani gilubodami moganemiyavo wana vemoimoinedi velemonoena.

6

Biyabiyama ada ina ke tama adiveimoya.

¹ E aku imi biyabiyama, imiyavo bademowa taumiyavo waawaegemi Kauveya wagaine faina, inamiyavo ke tamamiyavo wana matawalewaleyedi. Taidei dewa-nai gilubodami.†

²⁻³ Ada “inamiyavo ke tamamiyavo wana vemoimoinedi, e ada wanamiya iwakana ke wayawaimiyavo wana miyamiya tova manamanawena babi wagaine.” † Yaubada yana veimeya teni wagaidiya, taidei veimeya-nai nagona wa anavonadabadaba nodi.

⁴ Imi tamadiyavo, keke natu-miyavo wana kikivenuwakoyodi aenanai wana iveagougadi.† Aku aiyada wana itaveyabidi ke wana vonavona asevatudi, ada wa yami nuwakabubu wana kivetuvetunudi Kauveya Yeisu yana nuwanuwa anafaiweya.†

Toveimeyayavo ke togugai yogoyogodiyavo adiveimoya.

⁵ Aku imi togugai yogoyogomiyavo, amitoveimeyamomo babi taidei wagaine ani wa yami matauta ke wa yami vetatava nodi wana matawalewaleyedi aseasemi

† 6:1 Kol 3:20 † 6:2-3 Iyeg 20:12, 2Vei 5:16 † 6:4 Kol 3:21

† 6:4 Vona 22:6

matatabuna wagaine. Badi wana idibumwaigedi aku wana nuwaududuna, velemoena Keliso faine wafaifaisewa ada Banae Tauna wadibumwaigena.

⁶ Keke wanavona, “Akutoveimeya giitaitaku faina, gana idibudibumwaiga e ada banae gina awaveiwakaneku.” Aku velemoena tova-nai amitoveimeya keke ida itaitami, ani wa yami nuwaawaega wana faifaisewa. Faina imi bademowa wavetogugai yogoyogona Keliso faine, ada keke anafaiweya badi nuwanuwadi kaliva ina itadi ke ina awadavadavadi, aku wa yami aseawaega nodi wana gugai gavana Yaubada yana nuwanuwa anafaiweya.[†]

⁷ Wa yami vemwamwala wana gugugai vaita anafaiweya Keliso faine aku keke kaliva faidiya.

⁸ Taidei anafaiweya wana gugai, faina waalamanena velemoena vaita Kauveya Yeisu aimo kaliva seyana seyana gina fatana gugai iwakana gigugaiyena faina.[†] Kai bana togugai yogoyogona o kai keke togugai yogoyogona, aku au gina fatadi.

⁹ E aku imi toveimeyayavo, ani kaduwe anafaiweya wanadewa iwakana yami togugaiyavo wagaidiya. Keke wana awavematausidi, faina badiyavo ke imiyavo nodi amiToveimeya anakaibe-mowa gabameya waalamanena, ada Banae keke kaliva gida vevenuwadadanedi adiyegana wagaine ke gida luluvisi.[†]

Yaubada yana lokoloko gaviya kana osedi.

¹⁰ Tubuiyakuweyavo, kadu yaku vona seya-moena. Imiyavo Kauveya wana miyalabilabinena

[†] 6:6 Kol 3:22-25, Tai 2:9-10 [†] 6:8 Mad 16:27 [†] 6:9 Kol 4:1

velemoena ke wana awaegemi Banae wagaine, e ada yana toyogina lakai-vagaina wagaine gina kivetoyogimi.

¹¹ Yaubada yana lokoloko gaviya matatabuna wana osedi, e ada amifaiweya wana mididi toyogina tova-nai Seitani wa yana nuwauya gifwayafwayami ke gicaluvaluva gina daimi gina vebeumi. E ada keke anafata gina nuvuyoyemi.†

¹² Gilubodami gaviya analokoloko wana osedi, faina keke kaliva-mowa nodi kada lulugaviya, keke. Aku aiyada ide kalulugaviya badi aluwaluwa bwanebwanenedi yadi kaiwabu koyodiyavo nodi, badi yadi totoyogina wa yadi veimeya koyodiyavo nodi, badiyavo ani babi taidei anayuyuvana anatoveimeya, ada kaduwe aditoveimeya koyodiyavo iveiveimeya mwatugu nefanine.

¹³ Tainei faina, Yaubada yana lokoloko gaviya givilemi† ani matatabuna wana osedi. E ada tova koyona gina yegemona wagaine, imi amifaiweya wana midimididi toyogina. Ada wana lugaviya gin-aunau analaba gaviya wana luyabuna, aku aimo wa yami toyogina nodi wana midimididi.

¹⁴ E ada wana mididi toyogina. Yaubada yana lokoloko-dina gaviya ani taidei anafaiweya. Vona velemoena vaita beleta anafaiweya dobomiya wana yogodonena, ada dewa yegayegana vaita manawa anasebabala anafaiweya manawamiya wana osena.

¹⁵ Kaduwe taumiyavo wana kidewedewemi Yeisu yana kukuya anavaleyawakana

† 6:11 Iyem 4:7, 1Pi 5:8-9 † 6:13 2Kol 10:4

wagaine,[†] vaita ageyafayafa wana osedi ke agemi gina babalina.

¹⁶ Ada tova moyaina yami vetumagana anaveve wana abidonena e ada amifaiweya kaliva-nai koyona, banae Seitani, yana giyo alaalaiddi ani matatabuna wana vetomunumunudi.

¹⁷ Ada amikibababala Keliso givelemi ani wana vaina ke vaita gaviya anakedukedu anafaiweya kuluwamiya wanasena ke kuluwami gina babalina. Kaduwe anafaiweya Aluwaluwa Tabuna anabenisi manimaninina wana abina, taidei Yaubada yana vona wagaideya.[†]

¹⁸ Taidei gaitoma-dina wana vaidi, ada kaduwe tova moyaina veola tulina tulina wana inainanadi Yaubada wagaine Aluwaluwa Tabuna givewave-walemi mamauwe.[†] Yami veoveola-dina wagaiddiya wana itaita ke wana kidewadewa, ada keke wana kabekabebe aku tova moyaina wa yami atu-vefaila nodi wana veoveola Yaubada wagaine yana kalivayavo matatabudi faidiya.

¹⁹ Ada kaduwe wana veoveola Iya faikuya e ada kai gana ifuifufu, aga Yaubada vona gina veleku ke wa yaku asevatu kibababala anavaleya iwakana tuwaina-deya sewasewavuyena ani gana awamogatalena.[†]

²⁰ Yaubada giimiliku Iya yana toawatalatalaina taidei valeya-nai gana lulumamalena faina, ada taidei faina Iya malinai yogoyogoku deliya gamiyamiya. E ada wana veoveola faikuya ke wa yaku asevatu gana ifuifufu akulauboda anafaiweya.

[†] 6:15 Ais 52:7, Lom 10:15 [†] 6:17 Ibel 4:12 [†] 6:18 Luk 18:1

[†] 6:19 Kol 4:3-4

Paulo yana vetalakafoi.

²¹ Tubuiyakuweyavo, nuwanuwaku akuvaleyā wana alamanena, ada taidei faina tubuiya aseasema banāe Tikiko[†] gaimiimilina wagaimiya. Banāe togugai iwakana ke vevevilagina Kauveya Yeisu yana gugai wagaine. Ada gaitoma matatabuna gina awatalatalaina wagaimiya ke Iya faikuya wana alamanena, akulutovona ke gavadi gafaifaisewa.

²² Taidei vuvuna-nai faine banāe gaimilina wagaimiya e ada wana alamanena gavaiyamu yama miya, ada kaduwe aseasemi gina kiveasevatudi.

²³ Yaubada Tamada ke yada Kauveya Yeisu Keliso imi tubuiyameyavo nuwaniwalova ina velemini, ada kaduwe ina lememi wana venuwānuwakabubu seyana seyana ke yami vetumagana ina kivetoyogidi.

²⁴ Ada kaduwe imiyavo ke badi gavega nodi yami nuwakabubu wasevelavelalaina yada Kauveya Yeisu Keliso wagaine,[†] ani Yaubada yana nuwadogeya gina lemelememi. Ika anafaiweya.

Iyayeku Paulo

[†] 6:21 Gug 20:4, Kol 4:7-8, 2Tim 4:12 [†] 6:24 1Pi 1:8

Yaubada Yana Veyavo Anawai Evaguna
The New Testament in the Bwaidoka language of
Papua New Guinea
Nupela Testamen long tok ples Bwaidoka long Niugini
copyright © 2024 Wycliffe Bible Translators, Inc.

Language: Bwaidoka

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-11-22

PDF generated using Haiola and XeLaTeX on 22 Nov 2025 from source files dated 22 Nov 2025

b5406fa0-0156-5dfd-bdb9-797516d75cf2